



UPA 2015/43

Tillie Martinussen

28. april 2015

**Inatsisartut aamma Inatsisartut allaffeqarfiani aningaasartuutit tamanit
takuneqarsinnaangornissaat kiisalu kialluunniit paasiniaasinnaangornissaa
anguniarlugu Inatsisartut Suleriaasiata allanngortinnissaanut Inatsisartut
Siulittaasoqarfia saqqummiusseqqullugu peqquneqarnissaanik Inatsisartut
aalajangiiffigisassaattut siunnersuut.**

(Inatsisartunut ilaasortaq Randi Vestergaard Evaldsen, Demokraatit)

(Siullermeenera)

Demokraatini kissaatigaarput pisortat ingerlatsineranni sapinngisamik ammanerpaamik ingerlatsisoqarnissaa. Isumaqarpugut innuttaasup kialluunniit politikerit qinikkat Landskarsip aningaasaataanik qanoq atuinerat malinnaaffigisinnaasariaqaraa. Ullumikkut Naalakkersuisut kommuniinilu oqartussaaffiit pisussaaitaapput allattugaatinik takorusullutik qinnuteqartunut aningaasanik ingerlatsinertik takutissallugu. Tamannali Inatsisartuni ilaasortanut Inatsisartullu siulittaasoqarfianut atuutinngilaq. Ammasumik ingerlatsisariaqarpugut innuttaasunit takuneqarsinnaaqqullugu akileraarutit qanoq atorineqartarnersut.

Uuma siunnersuutip akuerineratigut siunissami kikkulluunniit politikerit assersuutigalugu ataatsimiiititaliat angalaneranni aningaasanik sumut atuisarnersut takusinnaangussagaluarpaat. Tamanna assut tapersersornarpoq. Tamatuma saniatigut siunnersuuteqartup siunnersuummini tunngavilersuutai tamaasa taperserpagut.

Siunnersuutip Inatsisartut Siulittaasoqarfiani suliareqqinneqassasoq innersuupparput.